

## **Fedoroacha letoi coroataja**

### *Acauru coaucane biha Fedoro*

<sup>1</sup> Canuna Jesocurisito letononeein- rai afosotolo Simoon Fedoroneeun. Cana Coaunera, chaen nii cana ichoteraneein nenea Jesocurisito, naaon-joainuri chabana nohanelanaala cana rai cao-hacha jataain nelatei teraneein neeuruhane esenetaeranequiche canacaanu rijijieeine raine caa quiricha laenaan. <sup>2</sup> Nii Cana Coaunera aina Cana Curuaanaa Jesocurisito coitucuhichene jaan aina cuaain, itolere inaraacha latei que inara rausi-aemiin Cana Coaunera, jeelai amuritoheriin raotjoein neeichene coina.

### *Jesocurisito ranojoi ichao*

<sup>3</sup> Cana Coaunerate itolere niicha ichana nainei ichaain, cana ichao rai canaacha latei tein, leinjiin cana suujua coaraain nihacachene jaanu tein ne. Nitohaneeinte nii niicha ichana nainei ichaain, cana cotiharaneein nenea coitucuerate cana que Cana Coaunera. <sup>4</sup> Satiin nii cana rai niicha tei aina cuaainte, cana rai tihane coina naitoonjoa jataain itolere amurijiriin itolere que nelatein nenea te Cana Coaunera. Nii aina cuaain niicha tei ichaonaa que ichaohin, nii itolere bana baaso coacuhin nitajerai niha cachane jaan jianein ichaohichene coina. <sup>5</sup> Aihana jaun, jereniha inara suujuane nihanatiin, atiin jeelai amuritoheriin jeriha Cana Coaunera rijijieein esenetaain

cha coitucuherranein neeichene coaratein,<sup>6</sup> inaraacha coitucui aina cuaain caohatiin coacuhin, baasonein coaauquiche inara suujua cuhanene tonoraelanaala, nererojoecaelanaala neein,<sup>7</sup> inara belaiha Cana Coaunerane rijijiein jiniiquiin ita belaa in ichaaoche.

<sup>8</sup> Nitohanai ichaain ichaohichene, coatiha inacojoein nelatelanaala nerinaain inara ichao. Niheichu inacojoein Cana Curuaanaa Jesocurisito coitucuriheeicheein. <sup>9</sup> Nete laen, nitohanai ichaelanaala nena, leinjiin maosa rijijiein cha coaraelanaala nihane jaun, jauriaalu rai nosa caje couluonohinihane baitein nihane jaun aicheein. <sup>10</sup> Canejeraauru, nitohanihane jaun, inae inara janijiin inara raain nihalu Cana Coaunerane jaun, esenetaaichene ilaauche inara suujua cuhane. Nitohanein neeichene coatiha chabana esenetaaichene jianeriheeicheein. <sup>11</sup> Chaen techu nitohanein neeichene, cana Curuaanaa Jesocurisito Cojoananaa chabana satonoelanaala nena bacuujuja neyoracaane jana ranojoeinein neriquicheein.

<sup>12</sup> Nii jaunne, inae caohachaain inara relauruhane jaan coitucuhin jeriha Cana Coaunerane rijijiein ichaohichene nihanatiin, itolere bana inara rai coaareeunni nabana baitequichene coataa. <sup>13</sup> Jaiti ichaaojihanune jaunte ne carai rauhi inara suujuatein nihanune coina. <sup>14</sup> Cana Curuaanaa Jesocurisitote, inae enanocoojoa orichaaunine coitucuerate canu que. <sup>15</sup> Nena atiin nainichaaunne jaun tiaajeein inara coroatajanereunni, inae ohanune baiha

satiin canuhacha ichai coacuhin neeichene coina.

*Itolere amurijiriin niicha ichana nainei ichaa  
Jesocurisitone*

<sup>16</sup> Nii niicha ichana nainei ichaain, turuhalu Cana Curuaanaa Jesocurisitone que inara relaacaanune jaan, coatiha raujiaain nereretanaa neein nena nihei. Niheichu coatiha canacaanu suujua caje rocohin cojoeluinain nohaniha aitohacaanu. Canacaanu nota que itolere ichaa Cana Curuaanaa Jesocurisitone jana coaracaanune jaan quena aitocaaanu.

<sup>17</sup> Coarajihacaanune jana techu, rai necaohacha tein jataain erenaa raotono que ereein rai Calaohi nihane cocoainaa: “Caate jataain canuhacha belaaainein, janijiin canuhacha tei cacalabine,” naain rai nii Calaohi cocoainaelu Cana Coaunera. <sup>18</sup> Nitohaneeine que banijiaain nena ichtatane ucuunno neein, Cana Curuaanaa aina jiniiquiin neein, dedeeu neein rai iriha Cana Coaunerane jana aonacaaunlu.

<sup>19</sup> Niite, esinae rauhijiriin berejetocuruha *profetacurune* coitucuhin esenetaain neeichene jaanu neein nena ne. Aihana jaun, caa canacaanuhacha beebejeite, leinjiin nocohenaanau jeraaen conohajeein conoha conone rijijieein inara conoera neein, janonaa rai mituhin conoha soaene rijijieein, inara suujua cuhane conaeranein nereein, turuha rai cojoanonaane que tiaain. <sup>20</sup> Aihana jaun, esinae rauhijiriin berejetocuruha *profetacurune* esenetaaichenete ne. Nii jaun, satiin Cana Coaunera Quiricha cuhane laenanohineein nena, coatiha suujua caje rocohin aitocuruha

*profetacurune* jaan nihei. <sup>21</sup> Aihana jaun, satiin *profetacuru* coatiha rai suujua caje rocohin aitoroetocuruhi, Cana Coaunera Suujue acauru que coitucueratihane jaunte, acauru que coitucueratihane rijjIEEEin berejetocurelu.

## 2

*Nechu joaenreen nohaneein cache relaauruhane.*

<sup>1</sup> Isaraelitaauru jana nihalu nohaneein cache relaaurera *profetacurune* rijjIEEEinte, inara jana netonai neeurureein cache coritaain cache relaaureraauru. Acaaurute jerichanejeein inara relaa nocoetiin, inara que asinojooineein nechu nohaneein inara relaaurureein suujua baaso caje rocohin. Nitohaneente inara ichoteraneein niha Jesocurisitone saijIEEEin, acaacha esenetaaichene caohateraneein neeurureein. Nitohaneeuruhane jaunte itajenojohi necurureein. <sup>2</sup> Arajiiichurute nechu nichao aasaeraanu que acauru ichao baaso rijjIEEEin ichaaorureein. Nii coaraainte chabana satonohelanaala nenea ichaonaanaja coero cuhane cana amaeraneein niha Jesocurisitone saijIEEEin que baasoneein ereeurureein cachaauru. <sup>3</sup> Nitohaneeuruhane jaunte, coriquiicha que coaacuruhane jaun inara cairichaaurureein, inara coritaain inara relaauruhane coreniha. Nete inae inoanlu caje coauneein casetecanohineein neeuruhane coina, inae ichanohineein nihane jaun caseteco coaracuruhane rai neeure. Nerihaain nii caje acauru ichotera.

<sup>4</sup> Cana Coaunerate, osa que nesaruhin neeuruha rai letonocuru aanjeraaurune jana,

acaauru que suujua acatelanaala, usi tabai aina nocohena tabai jana *cadena* que ichohanohineein jaonajaclu, satii coulurujuenoi niha cachaaurune cojoanona que turuhane reeintiaain cuu neeuruhane coina. <sup>5</sup> Nii rijijieein techu satii coitucuelanaala nenacaauru cachaauru que suujua acatenelu Cana Coaunera, inoaelu acau tabai que chauratane jooratihane bana. Acaihaniji Nohechate esinae rauhijiriin aca jerihane rijijieein ichaohin nihane coaratihane jaun ichoterateein, chaen aina caainsineein nenacaauru cachaauru ichoteratelu. <sup>6</sup> Jerichanejeein techu, Sodoma, Gomora, naajoaihunri neseuru cocoaichacuru mocoeratelu ajaneneein nitajeeuruhane que tiaaajoaain Cana Coaunera. Nitohaneente ichaelu Cana Coaunera, nii baiha neenihuru baaso ichajeein ichaonacaauru cachaauru notaaca niqui, nii caje ninaain baaso ichaelanaala ichaauruhane coina. <sup>7</sup> Nete laen Loto ichoteratelu, aca caohachaaain ichaohin, nii baaso ichacuruha necha aansaineein ichaonacaauru cachaaurune rautaaain coaraenihane jaun. <sup>8</sup> Nitohaneein jetaote, cojoanonetoojeein baaso ichaaain neeuruhane coaraain, baasoneeinchuru ita rai ereeuruhane aonaane jaun, que suujua rerohecaeriin niha Lotone jana ichoteratelu Cana Coaunera.

<sup>9</sup> Nitohaneente esenetaain rai cachaneein nenacaauru ichoterate cairichanojooineein neeuruhane caje Cana Coaunera. Nii rijijieein techu, caseteconein neenihuru casetecae, rai cojoanona que turuhanereein tiaain caseteco

neeuruhane caina. <sup>10</sup> Nitohaneeinte letoaa suujuane rijijiein baasohacha ichajeein, Cana Curuaanaa Jesocurisito batojoeiin nenacaauru casetecareein Cana Coaunera. Chaen techu erenaa tonoraelanaala enaacha joaenreein cha chaain, chaque casilanaala acaauru amurijiriin nenacaauru necoeje chanuhin naajoaauru. <sup>11</sup> Nete laen anjeraauru acaauru amuritoheriin cocoainanohineein neeuruha natiin, acaauru amurijiriin Cana Coauneraacha cocoainanohineein nenacaauru nocoeje chanunaa nainecurene.

<sup>12</sup> Nii suujua letono rijijiein baaso ichajeein ichaonacaauru cachaurute, nechu aiha leinjiin ataebinaene rijijiein cha coitucuelanaala ichaauruhane jaun, cha coacuelanaala joaereein niicha ichai ichacure. Chaen techu sohin jaonojoeinein itajenojoeinein neeuruhane caina inae ichanohineein neeure. Chaen techu niicha coitucuhi que nihanatiin enaacha baasoneein ereeure. Nete ooruha ataebinaecurune rijijiein ohin, <sup>13</sup> acaauru netonai leochaauru cairichain neeuruhane coreniha cairichei coaracurureein. Raotojoein niha nocoetiin niqui rachoojoenaa nitaje rai nena que rachoojoeure. Chaen techu jataain coejenacai aina osa que inara saruha inara aina rachoojoeure nechu inara coritaa beseta ichaain neeichene.

<sup>14</sup> Chaen techu ene coaracuruhane itolere bana jereein coaracure. Nii jaunte chabana osa que nesarucuruhane coejein jianena nainecurene. Chaen techu enaacha osa que leochaauru saruhin, itolere niicha latei jereein, queecha coacuhin nechu aansainein

ichaaore. <sup>15</sup> Nitohaneein neeuruhane jaunte, inae nitajenaaneein neure; Cana Coaunera bero rijijieein rene cana turuaeraneein niha Jesocurisitone saijieein, sacuelanaala jianein neeuruhane jaun. Nii jaunte aihalu Beor calaohi *profeta* Balaamne rijijieein neure. Aca jetaote coriqui jeriha baaso ichana jerihane jana jetao, <sup>16</sup> rai suujua coarihei amuneein baaso ichaa cuhane coataa jetao, cacha rijitiin rai ereein, baaso ichaane caohate nii amaera cabario rijijieein nena asno.

<sup>17</sup> Nitohaneei cacha relaeraneein nenacaaurute, caohacha que cacha relaelanaala, nechu cacha ichao asaaeraneein nena que cacha relaaure. Nii jaunte chabana satonoelanaala nena nocohenaanau caseteconein neeurureein. <sup>18</sup> Itolere quete niqui ereeure. Nete jataain joenreein aitocure. Nitohaneeinte, acaauru ichao rijijieein ichaaoruhane jianein, ena Cana Coaunera coitucunaa nunuhetejeeureraaurucachaauru saruure osa que. <sup>19</sup> Itolereneein niicha ichana jerei ichaa cachane jereeinte niqui ereeure. Nete acaauru itajeranu letononeein netiin aitocure, satiin cacha, rai suujua saruhera tonoraain nena rai letononeein nihane jaun. <sup>20</sup> Nitohanihane jaunte inae Cana Coaunera coitucuhin, cana ichoteraneein nena Jesocurisitone maajeein coitucuhin nihane jaun, inae Cana Coaunera coitucuelanaala nenacaauru ichao rijijieein ichaohane caje nichoteein nihane saijieein, nacoaunein nii jauriaalu aihalune rijijieein ichaohin niha cachane, jauriaa aihalune amuritoheriin

baasoneein ichoae. <sup>21</sup> Nitohanihane coataate niqui nirijieein, cana ichoteraneein niha Jesocurisitone coitucuelanaala neeuruhane caohachae. Nabana acauru rai tenojoinieein niha nii cana rai beratenojoi Cana Coaunera caje nenaane saijieein que jaolecooruhane coataa. <sup>22</sup> Nete inae nitohaneeururichaaaine que: “Narohane baihate jeelai naro qui remaae. Caohatiin culeenojoinihane saijieeinte inae nacoauneein naticho cuhane cue coosi,” naa acauru que erenaane rijijieein neeure.

### 3

#### *Nacoauneei tururichaaain Jesocurisitone*

<sup>1</sup> Caa quete, inae coroata sae quiricha laenaain letoaanu jataain canuhacha belaaieein neiniquichene rainera canejeraauru. Nii coroatajai canuhacha laenai quiricha cuhanena inara suujuateun, caohachaaain inara suujua coaraain, baaso coacuelanaala rauhijiriin coacuhin neeichene jerichaaunne jaun. <sup>2</sup> Inoaenlu inara rai berejetocuruha Cana Coaunera tenojoinieein nenaacauru *profetacurune* coacuhin, inara relaerateein nihalu rai afosotooro que cana ichoteraneein nena Jesocurisitone coacuhin neeuche.

<sup>3-4</sup> Inae caa baihate nechü inara necoeje chanuha: “Aanca Jesocurisito. Nacoauneein turuhane coinatē niqui aitelu. Inae ohacoaauruha cana foerateracuru niqui, nete jerichanejeein sacue necoaunaan cana rai chauratanene caje coauneein nihane rijijieein,” naain ereeururichain nechü jeriha acauru suujuane rijijieein baaso ichajeein



ichaonacaauru cachaaaurune que nainaan ichaaoche. <sup>5</sup> Nitohaniha acaauru ichaone jaunte, jaiti necoanaeniha satiin itolerene ajiniha, inae nesiha dedene jana, acau nejesinaneein niha caa chauratanene jana, nitohaneein jeriha Cana Coaunerana jaun, acau caje counanohineein nihalu caa cana rai chauratanene coitucuhin esenetana jerecurene. <sup>6</sup> Nii rijijieein techu, elo tabai aina cuaain itajenojoinnein nelu caa cana rai chauratane. <sup>7</sup> Nete laen, caa ena nena dede, chauratane, naonjoainuri, inae nitohaneein jeriha Cana Coaunerana jaun, usi tabai que nitajeeuruhane coina rucuhenhineein neeure. Nii usi tabai, baaso icharaauru itajeranuneein nenaate, acaauru mocoreein cana janonaa satono bana.

<sup>8</sup> Canejeraauru, jiaonriha Cana Coaunera rai le jiichoo, le oaraanca jaanacanei carajanihane jana, le oaraanca jaanacanei le jiichoonejihane baitichache. <sup>9</sup> Coatihani niqui aitocuruha esenetaichuru tabaaaurune rijijieein, cana rai naitoonjoan tihane baitihane jaun, caeneenejihei Cana Coaunera. Chuni nitajihane jerenihane jaunte, saain nichoteein niha cachane jerihane jaun, jaiti inara cojoae Cana Coaunera.

<sup>10</sup> Nete inae ecu tihane bana, coitucueraelanaala turuha asijiautone rijijieein, coitucueraelanaala turoreein cana Curuaanaa Jesocurisito. Nii janate tonijiaain coasinacaain neranuha cureein caa canaacha coarajei dede. Itolere, que nenacaauru netonaite itajereein usi. Jana chauratanete satiin que nenacaauru aina jiniiquiin coaraain benojoinereein Cana

Coaunera rai.

<sup>11</sup> Nitohaneein nitajerichaain itolerene jaun, leecha que coacuelanaala, jeriha Cana Coaunerane rijijieein ichaaoche. <sup>12</sup> Aihana jaun, chajaain jeriha Cana Coaunerane rijijieein neeuchete carajaelanaala turuhine. Inae turuhane banate, usi tabai que itajenojoiniha cureein caa dede canaacha coarajei. Itolereite nii usi jana neein mocoreein. <sup>13</sup> Nete nitohanihane nihanatiin, cana laen ena nenea dede, ena nenea chauratane, naaonjoaihunri cana rai tihane coina Cana Coaunera aitoonjoa cohajerichaacheein. Ecu coatiha inae nerinaain baaso, caohacha nejesinaachate nereein.

<sup>14</sup> Canejeraauru, aihana jaun, nii que turuhane cohajein, caohachaain ichaaochete osa colane raotojoein cha ujuaihonelanaala neeichene jana, inara eruhine Cana Coaunera. <sup>15</sup> Aihana jaun, satiin nichotena coina, cana cohaca jaiti turueniha cana Curuaanaane coitucuhin que nainaain neeuche. Nii quete inara rai niicha laenai quiricha cuhane been laenaeraete cana nejera Faboro, que coitucueratiha Cana Coaunerane caje coitucuhin. <sup>16</sup> Le quirichauru niicha laenai nainetiinte, nii que aitiin been laenaeraete cana nejera Faboro. Nete tabaauru coitucunacaene caaintatiin aitothane jaun. Nii jaunte, leechaauru Quiricha laenanohineein nenea ichacuruhane rijijieein, acaauru jerecuruhane rijijieein rotohi que cacha relaaure, tabaauru caohachaain suujua coaraelanaala nenacaauru cachaauru. Nii corenihate, caseteco coaracurureein inae ecu tihane bana.

17 Canejeraauru, nitohanihane jaun, inae nii ajiniha caje coauneen nii coitucuhin neeichene jaun, inara coritauruha nechu aansai cachaaurune esenetaaichene coataa que nainain ichaaoche. Nabana inara coritauruhane esenetaain inara suujua coreein acauru rijijieen neeichene coataa. 18 Nete jeelai amuritoheriin cana ichoteraneein nenea Cana Curuaanaa Jesocurisito coitucuhin, jiniiquiin aca jerihane rijijieen ita belain neeichene caohachae. Aca acaneein nihane coitucuhin coroaecuruhine chabana satonoelanaala. Nitohaneen neeine.

## **Cana Coaunera Ere** **New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

### **Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Urarina

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
b7ea44d4-3dbd-507b-9a19-256b56fe9b07